

TONG yulduzi

Vatan yagonadir,
Vatan bittadir!

www.tongyulduzi.uz

2011-YIL
21-NOYABR
N:47
(66848)

ISSN – 2010-6092

Gazeta 1929-yil 1-avgustdan chiqa boshlagan

O'zbekiston Respublikasi bolalar va o'smirlar gazetasi

KO'HNA VA NAVQIRON BUXORO!



Yurtimizning eng so'lim go'shalaridan bo'lgan Buxoro viloyatiga bunday ta'rif berilishining nechog'li o'rinli ekanligiga u erga qilgan safarimiz chog'ida yana bir bor amin bo'ldik.

An'anaga ko'ra, respublikamiz bo'ylab «Tong yulduzi» kunlarini o'tkazishni aynan shu viloyatdan

boshlashimizning ham xosiyati bor, albatta. Zero, bu ko'hna zaminda ko'plab aziz-avliyolar, necha-necha buyuk allomalar mangu orom topgan. Ularning xotirasini yod etish, ziyorat qilish barchamizning muqaddas burchimizdir.

Osmon ostidagi muzeyga qiyoslanadigan Buxoroga kirib borganimizda bobo quyosh ufqdan endigina bosh ko'tarayotgandi. Shaharga allanechuk mahobat baxsh etib turgan osmono'par minoralar uning zarrin nurlaridan jilolanib, yanada sirlilik kasb etadi. Milliylik va zamonaviylik uyg'unligidagi yangi-yangi maktablar, litsey va kollejlari, musiqa va sport maktablari ham shahar ko'rkiga ko'rk qo'shib turibdi...

Muxbir safardan qaytdi

Suzalar mualliflari Zubayda va Fazliddin



Davomi 5-betda



BIRINCHI

Bilasizmi, birinchi bor Yer aylanasi uzunligini kim hisoblagan? Albatta, Abu Rayhon Beruniy bobongizdir. Hindistondagi Nanda qo'rg'onida istiqomat qilgan va shu yerda Yer aylanasi uzunligini tog' perpendikulyari orqali o'lchash mumkinligini isbot etgan.

Bu juda katta bilimni talab etadi. Siz-chi? Siz ham fanda yangilik yaratib millatimiz nomini sharafta burkash haqida o'ylayapsizmi, yo'qmi?!

ABDULLA ANSORIY KIM BO'LGAN?

Bolalar!

Bu nomni tez-tez eshitib turasiz. Bu inson 1006-1088-yillarda yashagan. O'n to'rt yoshida sayohatga chiqib, Balx, Nishopur va boshqa shaharlarda yashagan.


«Munozot».

«Ganjnoma», «Muhabbatnoma», «Nasihatlar» kabi asarlarning muallifi. 6 ming baytadan ortiq she'r yozgan.

Uning bir to'rtligini e'tiboringizga havola etyapmiz.

Nafsingni agar qilib nishon ketgaysan,
O'zingni xarob etish tomon ketgaysan.
Boq o'zingga: kimsan-u, qayerdan kelding?
Angla: ne qilarsen-u, qayon ketgaysan?

BIZNING GALAKTIKA



Bizning Galaktika o'rama galaktikalar turiga oid bo'lib, Quyosh bilan birga taxminan 200 milliard yulduzni o'z ichiga oladi. Bu osmon jismlarining qanday kuchlar hisobiga harakatlanishi haqida haligacha maxsus ilmiy adabiyot ham, maxsus gipoteza ham yo'q. Demak, bir dononing «Men hali hech narsa bilmayman», degan gapida jon bor. Siz qanday fikrdasiz, o'quvchim?

SHAHNOZA tayyorladi

Qadrli bolalar! Biz Sizga ilgari Abu Rayhon Beruniy va Muso ibn Muhammad al-Xorazmiy singari buyuk olimlarimiz haqida hikoya qilgandik. Bugungi hikoyamiz yana bir mashhur yurtdoshimiz Ahmad al-Farg'oni haqida.

Biz bir guruh yoshlar o'tgan asrning 80-yillarida Misrga sayohat qilgandik. Ko'hna Qohira, ulkan Piramidalar, Kleopatra va Tutanxamonning muzeyidagi yodgorliklar bizni hayratga soldi. Mamlakatning qon tomiri sanalmish Nil daryosining sohillarida yurib, uning go'zalligidan bahramand bo'ldik. Lekin o'sha paytda bizga bu ulkan daryoning suv sathini belgilovchi uskunani 861-yilda yashagan hamyurtimiz Ahmad Farg'oni yaratgani haqida ma'lumot berishmagan. Istiqolot tufayli shunday ulug' alloma yashab o'tganligi, olamshumul kashfiyotlar qilganligi, Bag'doddagi dunyoga mashhur «Bayt ul-hikma», ya'ni «Ma'mun akademiyasi»da ishlaganligini bilib oldik.

Alloma Farg'ona vodiysining Kubo (Quva) qishlog'ida taxminan 797-yilda tug'ilgan. Shunisi ma'lumki, olim xalifa Xorun ar-Rashidning sharqiy yerlaridagi muovini, o'g'li Abdullohning (bo'lajak xalifa al-Ma'munning) Mavrdagi olimlari bilan birga faoliyat yuritgan.

Xalifa Xorun ar-Rashid 809-yili Tusda vafot etganidan so'ng, taxtga uning katta o'g'li Muhammad al-Amin o'tiradi. Lekin xurosonlik a'yonlar esa Abdullohni taxtga o'tirishga da'vat etadilar. Taxt uchun ikki yil davom etgan kurashlardan so'ng Abdullohning qo'li baland kelib, 813-yilda taxtni egallaydi. Lekin u Bag'dodga bormay 819-yilgacha Marvda yashaydi. Natijada, Marv 813-yildan to 819-yilgacha xalifalikning vaqtincha poytaxti ham bo'ladi. 819-yilda al-Ma'mun butun saroy a'yonlari va ulamolari bilan birga Bag'dodga ko'chadi. Ular orasida al-Farg'oni nomi eslatilmaydi. Ma'lumki, o'sha vaqtda ilmiy markaz tasarrufida ikkita rasadxona bo'lgan. Lekin, Abu Rayhon Beruniy ta'kidlagan bir ma'lumotda Bag'dod rasadxonasida Yahyo ibn Abu Mansur Muhammad al-Xorazmiy va boshqa olimlar ishlashgan. Damashq rasadxonasida esa Xolid ibn Abdumalik va Ahmad-Farg'oni kabi ikkinchi

guruh olimlar ishlashgan.

Ahmad al-Farg'oniying asosiy astronomik asari «Samoviy harakatlar va umumiy ilmi nujum kitobi» bo'lib, u ko'p marotaba Yevropa tillariga tarjima qilingan. Bu kitob g'arbda «Alfraganus» nomi bilan mashhur bo'lgan.

Hozirgi kunda Ahmad Farg'oniying sakkizta asari ma'lum bo'lib, ularning barchasi astronomiyaga oiddir. Mazkur qo'lyozmalar Berlin, London, Mashhad, Parij, Rampur, Patna va Tehron kutubxonalarida saqlanmoqda.

Istiqolga erishganimizdan so'ng O'zbekistonda uning ilmiy merosini o'rganishga alohida e'tibor qaratildi. Bir qator ko'chalarga, o'quv yurtlariga uning nomi berildi. Farg'onada uning ulkan haykali o'rnatildi. 1998-yilda mashhur allomaning tavalludiga 1200 yil to'lishi keng nishonlandi.

Davrlar o'tadi, mashhur allomalarning dunyo ilm-fani ravnagiga muhim hissa bo'lib qo'shilgan ilmiy ishlari, ixtirolari, kitoblari va ibratli hayoti yorqin sahifa bo'lib qoladi.

Jabbor RAZZOQOV,

O'zbekistonda xizmat ko'rsatgan jurnalist


XATCHO'PINGIZ BORMI?

Yetti-sakkiz yoshlarimda darsliklar bilan birga ertak kitoblar o'qib turardim. Buvim menga qog'ozdan chiroyli xatcho'plar yasab berardilar. Varaqlarni buklashni, tufuk bilan barmoqni bo'llab, kitob varaqlashni xush ko'rmasdilar. Kecha oynayi jahon orqali shu mavzuga oid lavhani ko'rib, xatcho'p yasab bergan buvim ko'z oldimga keldi. U kishi aytar edilar:

«Kitob – muqaddas. Unga ozor berish gunoh. Bu bir! Ikkinchidan, qo'lni labga tekkazib, kitob varaqlash sog'liqqa ziyon. Varaqni buklab qo'yish odobsizlik belgisi. Haqiqiy kitobxonda, albatta, xatcho'p bo'lishi kerak».

Qaysi kuni buvimdan qolgan eski kitobni ochsam, ichidan xatcho'p tushdi. Shu bahona yana bir voqeani esladim. Hozirgi bolalar kechasi ertak eshitish o'rniga bo'lar-bo'lmas filmlar-u, teleseriallar ko'rib, voyaga yetishyapti. Zamona-da, dersiz? Sal shoshmang!

Ertaklarning ham turfa xili bo'lgan. Lekin onam, buvimlar ulardan bolalarning tarbiyasiga moslarini so'zlab berganlar. Demak, biz ham bolalarga o'z yoshlariga mos filmlarni tomosha qilishga ruxsat berishimiz kerak. Endi masalaning yana bir tomoni bor: nega hozirgi onalar ertak, dostonlarni kam biladilar? Bunga sabab nima? Vaholanki, bola tarbiya qilayotgan onaning o'zi o'ta ma'naviyatli bo'lishi kerak. Aksincha bo'lsa-chi? Unda o'zimizga qiyin.



Qaysi ota yoki ona har oyda farzandiga bitta kitob olib berayotgan bo'lsa, demak, ular bolasining kelajagiga bitta oltin g'isht qo'ymoqdalar. Bu oshirib aytiladigan gap emas. Bo'ladigani shu. Dunyoning eng mashhur insonlari hayotiga bo'qing: ular bir ovozdan «Shu darajaga yetishimda kitob qo'l keldi», deysishgan.

Kitob o'qigan bola fikrlay boshlaydi. Fikrladimi, demak, u nima ish qilayotganini yaxshi tushunadi. Fikri bor insonni aldash qiyin. Bunday bola Vatanni ardoqlashni ham biladi. Bunday bola ota-onasini boshiga ko'taradi. Shuni istaysizmi, bolangizga xatcho'p yasashni o'rgating: bu bilan uni odobli bo'lishga, sog'lig'ini, kitobni, Vatanni asrashga o'rgatasiz.

To'lqin HAYIT



Sizga havas qilaman!

«Tong yulduzi» tahririyatiga juda ko'plab mehmonlar tashrif buyurishadi. O'quvchilar bilan bir qatorda ustozlarning tashrifidan ham boshimiz ko'kka yetadi. Maktablarda o'tayotgan tadbirlar, yangiliklardan bizni boxabar qilish maqsadida kelgan ustozlarni jon qulog'imiz bilan tinglaymiz.

– deydi Dilbar opa bolalik yillarini xotirlab. – Bu gapimni eshitgan otam: «Qizim, sizga bir kasb aytay, siz bu kasbni egallab, ko'plab huquqshunoslar yetishtiring. Katta bo'lganingizda, o'qituvchi bo'ling», deganlari hanuz yodimda. Mana, oradan yillar o'tdi. O'ylab ko'rsam, otamning orzusi menga bugun katta baxt hadya etayotgan ekan. O'quvchilarim, qadrdon maskanim hayotimning mazmuniga aylangan.

Bugungi kunda o'quvchilarga odobnoma fanidan saboq bermoqdaman. O'quvchilarimning har

tomonlama yetuk, mukammal bo'lib kamol topishlari uchun ma'naviyat darslarida nafaqat yurtimizda bo'layotgan o'zgarishlar, balki dunyo yangiliklaridan ham xabardor qilib borishni vazifam deb bilaman.

– Aytib o'tganingizdek, yosh avlodni komil inson qilib tarbiyalash ustozlardan katta mas'uliyat talab qiladi. Ayni damda mehnatlaringiz samarasidan ko'nglingiz to'lyaptimi?

– Bu yil pedagogik faoliyatimga yigirma yil to'ldi. Maktab partasida o'tirgan o'g'il-qizlarga boqib, beixtiyor o'quvchilik yillarimni xotirlayman. Bugungi kunda Yurtboshimizning yoshlarga qaratayotgan e'tiborlariga, yaratilayotgan imkoniyatlarga, zamonaviy, davr talabiga mos o'quv maskanlariga havasim keladi... O'quvchilarimga ta'limdan tashqari, odob-axloqdan saboq berganim, tarixni chuqur o'rgatganim besamar ketmayapti. Negaki, ularning barchasi ko'z o'ngimda orzu qilganimdek har tomonlama mukammal bo'lib voyaga yetmoqdalar.

Dilbar opa bilan uzoq suhbatlashdik. Opaning o'z kasbining fidoyisi, o'quvchilarning sevimli ustozlari ekanligi gap-so'zlaridan sezilib turardi. Suhbatimiz so'nggida opaning ezgu maqsad yo'lidagi mas'uliyatli ishlarida omad tilab, ustoz bilan xayrlashdik.

Gulyuz BAHODIR qizi



Dilbar SUVONOVA ko'p yillardan buyon gazetamizda o'z maqolalari bilan faol qatnashib keladilar. O'zlari faoliyat yuritayotgan Surxondaryo viloyati, Termiz shahridagi 12-«Mehribonlik uyi» negizidagi umumta'lim maktabida direktor o'rinbosari vazifasida ishlayotgan opa tahririyatimizga bir o'lam yangiliklar bilan tashrif buyuribdilar.

– Otam huquqshunos bo'lganlar. Ularga havas qilib: «Katta bo'lsam, huquqshunos bo'laman», deya orzu qilardim,



Bolalar maydonchalarida

Bola! Dunyodagi eng to'li so'z. Bolalik esa inson umrining eng beg'ubor, betakror damlari sanaladi. Dunyodagi eng yaxshi narsalarni bolalarga ilinishimiz ham bejiz emas. Yurtimizning turli go'shalarida, mahallalarda, ko'p qavatli uylar atrofida barpo etilayotgan «Bolalar maydonchalari» fikrimiz dalili bo'la oladi. Andijon viloyatida Mustaqilligimizning 20 yilligi munosabati bilan qad rostlagan «Quyuncha» nomli maydoncha ulug'norlik bolajonlar uchun ajoyib sovg'a bo'ldi.

Andijon viloyati, Ulug'nor tumanidagi 16-Davlat ixtisoslashgan umumta'lim maktabining 9-sinf o'quvchisi Isfandiyor Burgutov maydonchada bolajonlar uchun yaratilgan sharoitlar haqida to'liqlanib yozadi:



ULUG'NORLIK
BOLAJONLAR
QUVONCHI



– Maydonchani ochilish marosimi nafaqat bolajonlar, balki ularning ota-onalari uchun ham haqiqiy bayram bo'ldi. Chevar onaxonlarimiz maydonchada bolajonlarning o'ynashlari uchun yumshoq o'yinchoqlar tikib berishdi. Unga birlashtirilgan tarbiyachilar esa qiziqarli o'yinlar o'ylab topib, bo'sh vaqtning xush o'tishiga hissa qo'shishyapti. «Kamolot» yoshlar ijtimoiy harakati faollari deyarli har kuni «Kunni mazmunli o'tkaz!» tadbirlarini tashkillashtirishyapti.

Yaqinda «Kamolot» va «Kamalak» tashkiloti faollari besh yoshdan o'n yoshgacha bo'lgan bolalar orasida «Prezident farzandlari» ko'rik-tanlovi o'tkazishdi.

«Quyuncha»da bunday tadbirlar deyarli har kuni tashkillashtiriladi. Maydonchada yangrayotgan bolajonlarning sho'x-shodon ovozlari sadosi kayfiyatimizni ko'tarib yuboradi va beixtiyor bolalik damlarimizni yodga soladi...

Quvnoq bolalik damlari «Quyuncha» kabi maydonchalarda quvnoq o'tayotgan jajjilarga havas qilsa arziydi.

O'z muxbirimiz

KONSTITUTSIYA BAYRAMIGA SOVG'AM

Men poytaxtimizning Uchtepa tumanidagi 197-maktabda o'qiyman. Darsdan bosish vaqtlarimda ingliz tili va to'quvchilik to'garaklariga qatnashaman.



Birinchi to'qigan ishim qalpoqcha bo'lib, uni singlimga birinchi qor yog'ishi munosabati bilan tuhfa qildim. Keyingi ishim esa gulli bezaklar tushirilgan ko'ylakcha bo'lib, uni kichik singlim Maryamga sovg'a qildim. Singlimning ko'zlaridagi quvonch oila a'zolarimizni quvonтираб yubordi.

Shu kunlarda respublikamiz Konstitutsiyasi kuniga atab Davlatimiz bayrog'ini to'qiyapman. Bayroqchani to'qishda bor mahoratimni ishga solaman va uni maktabimga sovg'a qilaman.

Shahribonu JAHONGIROVA,
Uchtepa tumanidagi
197-maktabning
5-«B» sinf o'quvchisi

31-modda: «Hamma uchun vijdon erkinligi kafolatlanadi. Har bir inson xohlagan diniga e'tiqod qilish yoki hech qaysi dinga e'tiqod qilmaslik huquqiga ega. Diniy qarashlarni majburan singdirishga yo'l qo'yilmaydi.»
«O'zbekiston Respublikasining Konstitutsiyasi»dan

Bolajonlar, polvonkelbat san'atkor, taniqli so'z ustasi Shukrullo Isoilov qaysi maktabda o'qiganligi siz uchun qiziq bo'lsa kerak? Bu Toshkent shahar, Yunusobod tumanidagi 96-maktab bo'lib, xonanda Jzzat Ibrohimov ham mazkur ilm dargohini namunali xulq bilan tugatgan ekan. Bu maskanda bugungi kunda 250 nafar o'quvchi tahsil oladi. Maktabda ko'plab tadbirlar, tanlov va musobaqalar o'tkazish yaxshi an'anaga aylangan.

Mazkur ilm maskanida yaqinda «Diniy ekstremizm va terrorchilikning – yoshlar kelajagiga tahdidi» nomli tadbir bo'lib o'tdi. Tadbirda so'z olganlar, bugungi kunda turli davlatlarda bo'layotgan qo'poruvchilik xurujlari, ekstremistlarning aynan yoshlarga o'tkazayotgan ta'siri, ularning aldanib qolmasliklari uchun nimalarga e'tibor berish kerakligi haqida qizg'in suhbat bo'lib o'tdi. Maktab direktori Nargiza opa Ziyayeva o'quvchilarning darsdan bo'sh vaqtlarini mazmunli o'tkazishlari uchun ularni to'garaklarga, sport seksiyalariga jalb etish maqsadga muvofiq bo'lishini ta'kidladilar.



TADBIRDAN SO'NG...

Biz tadbir ishtirokchilaridan ayrimlarini suhbatga tortdik:

– Bugungi tadbirdan katta taassurot oldim, – dedi 8-sinf o'quvchisi **Risolat NOSIRXO'JAYEVA**. –Maktabimizda turli to'garaklar ochilgan. Men ham til o'rganishga qiziqaman. O'tgan yili chet tillaridan bo'lib o'tgan fan olimpiadasida 2-o'rinni egalladim. Bu yil o'z ustimda yanada ko'proq ishlab, birinchi o'rinni olishga, maktabimizning, qolaversa, oyijonimning mehnatlarini oqlashga harakat qilaman.

Jahongir SHAROFIDDINOV, 9-sinf o'quvchisi:

– Men boks bo'yicha Rossiyada bo'lib o'tgan davlatlararo chempionatda qatnashib, yurtimizga oltin medal bilan qaytdim. Bir so'z bilan aytganda, turli diniy oqimlar xurujiga erishayotgan yutuqlarim bilan qarshi javob beryapman, deb o'ylayman.

– Men «Bolalar ijodiyoti» saroyidagi rassomchilik va dizayn to'garagiga qatnashaman. O'tgan yili «Yangi avlod» bolalar ijodiyoti festivalida adabiyot yo'nalishi bo'yicha 4-o'rinni egalladim. Turli zararli oqimlarga qarshi biz yaxshi xulq va a'lo baholarimiz bilan javob berishimiz kerak, – dedi 9-sinf o'quvchisi **Laziza TO'LAGANOVA**.

Ozoda **TURSUNBOYEVA** suhbatlashdi

Abbos YUNUSXO'JAYEV, 8-sinf o'quvchisi:

– Men sportning kikkoksing turi bilan shug'ullanaman. Bu yil tumanlararo bo'lib o'tgan musobaqada oltin medal bilan taqdirlandim. Bu yutuq bilan cheklanib qolmayman, albatta. Tadbirga kelsak, agar qalbimizda yurtimizga muhabbat, o'zimizga qat'iy ishonch bo'lsa, hech qanday kuch bizni o'z izmiga sola olmaydi.

Bu e'tiqodli, intiluvchan o'g'il-qizlarning kelgusida yurt koriga yaraydigan barkamol avlod bo'lib ulg'ayishlariga ishonamiz.



CHIPORVOYNING SARGUZASHTLARI

Qishlog'imiz baland qir-adirlar bag'rida joylashgani bois tulkiyar yemish izlab, ahyon-ahyonda qishloq oralab turishadi. Biz ham o'rdak va tovuq boqamiz. Bu yil uchta ona tovuq'imiz jo'ja ochildi. Jo'jalar bir-biridan chiroyli, do'mboqqina.

Uch-to'rt oy deganda ular kattagina bo'lib qolishdi. Ayniqsa, ularning orasida bitta chipor jo'ja ochko'zligi, chaqqonligi bilan ajralib turadi. Biroz beparvo qolsak, dasturxonidagi non ushoqlarini olib qochishdan ham toymaydi. Har kuni nonushta mahali eshik oldida poylab turadi.

Bir kuni ertalab hovlida Chiporvoy ko'rinnadi. Tushlik mahali don sepganimda ham boshqa jo'jalar kabi yugurib kelmadi. Uni izlamagan joyim qolmadi. Qo'ni-qo'shnilar ham so'radim. Hech kim ko'rmabdi. Chipor tovuqchani tulki olib ketganiga shubham yo'q edi.

Kechki payt qo'zilar yem yeydigan, doim to'nkarilib turadigan tog'oracha «taq-tuq» qilib qoldi. Hayron bo'ldim, keyin sekin borib tog'orani ko'tardim. Men kun bo'yi axtargan chipor jo'ja tog'ora tagidan chiqib, chopqillagancha o'zini jo'jalar orasiga urdi. Yem qoldiqlarini cho'qilib turganda to'nkarilmay qolgan tog'ora ochko'z Chiporning ustiga to'nkarilib qolgan va u kun bo'yi o'sha yerda qolib ketgan ekan. Shunga aytisalar kerak-da, «Ozga qanoat qilmagan, ko'pdan quruq qoladi», deb...

Sayyora **MIRZAYOROVA**,
Surxondaryo viloyati, Qumqo'rg'on tumanidagi
49-maktab o'qituvchisi



BOBOM – FAXRIM

Mening katta bobom Qayum Ramazon 18 yoshlarida Abdurauf Fitratdek ulug'alloma bilan birgalikda «Ona tili» darsligini yaratganlar. Markaziy Osiyodagi ilk universitet tashkilotchilaridan biri bo'lgan Munavvarqori Abdurashidxonovlar bilan bir qatorda dorilfununning birinchi pedagoglaridan bo'lganlari hamisha qalbimda iftixor tuyg'usini uyg'otadi. Bobokalonim «O'ktam», «Turg'un-boy», «Tomoshachi» taxalluslari bilan teatr san'ati, maorif sohasida ko'plab maqolalar chop ettirganlar. Mohir tarjimon sifatidagi mehnatlari ham ko'pchilik tomonidan e'tirof etilgan.

Bobom ayni ijod pallasi, 38 yoshlarida qatag'on qurboni bo'lganlar. Bu esa murg'ak ko'nglimni o'ksitib keldirdi. Nihoyat bobom haqida izlanishlar olib borishga ahd qildim. Ra'no Sayfullayeva, Tolibjon Enazarov, Muhabbat Qurbonova, Ulug'bek Dolimov, Nodiraxon Alavutdinova, Dilfuza Rahmatullayeva kabi ijodkorlar bilan muloqotda bo'lib ma'lumotlar to'pladim. Izlanishlarim samarasi sifatida «Qayum Ramazonning ilmiy merosi» nomli mo'jazgina kitobcha dunyoga keldi. Bobom kabi yurtning asl farzandi bo'lish mening yagona orzuim.

Dilbar **RAMAZON**,
Toshkent Islom universiteti
qoshidagi akademik litsey o'quvchisi





(Boshi 1-betda)

Buxoroliklarning mehmondo'stligi, samimiyligini aytmaysizmi, suhbatlariga to'ymaysan kishi! Maktabga oshiqayotgan o'g'il-qizlar qo'llarini ko'ksilariga qo'yib, salomni kanda qilmay o'tishadi. Shunday aqlli, odobli bolajonlarning ta'lim-tarbiyasi bilan, ular uchun yaratilayotgan shart-sharoitlar bilan qiziqdik. Bu boradagi savollarimizga javob olish maqsadida viloyat Xalq ta'limi boshqarmasi boshlig'i o'rinbosari Rajabzoda H.A.L.Mni suhbatga chorladik:



KO'HNA VA NAVQIRON BUXORO!

– Bundan bir-ikki yil avval viloyatingizda bo'lgan kishi Buxoroning bugungi qiyofasidan hayratga tushishi tayin. Ayniqsa, kelajagimiz egalari uchun bunyod etilgan inshootlar ko'zni quvontiradi.

– Darhaqiqat, viloyatimizdagi bugungi o'zgarishlar havas qilsa arzigudek. 534 ta umumta'lim maktablari faoliyat ko'rsatayotgan bo'lib, ularda 253 mingdan ziyod o'g'il-

Ulardan 90 tonna go'sht, 800 litr sut hamda 173 ming 500 dona tuxum olindi. Shuningdek, 441 tonna-yu, 900 kg meva, 304,2 tonna kartoshka, 62,0 tonna piyoz, 37 tonna-yu, 730 kg poliz, 28 tonna-yu 540 kg sabzavot mahsulotlari, 133,0 tonna donli ekinlar yetishtirildi. 353 mln 900 ming so'mlik xizmat ko'rsatish va servis sohasini rivojlantirish hisobidan byudjetdan tashqari mablag'lar topishga erishildi.

yoshlarni, ayniqsa, qizlarni ommaviy sportga jalb qilish yuzasidan viloyatimizda muayyan ishlar amalga oshirilmoqda. Viloyatimiz o'quvchilarining 97153 nafari (23,3 foizi) sport bilan muntazam shug'ullanib kelmoqdalar. Shulardan 38530 nafari qizlar tashkil etadi.

Viloyat Xalq ta'limi boshqarmasi tasarrufidagi bolalar va o'smirlar sport maktablari soni 2003-yilda 34 tani



Bugungi kunda 70

ta ta'lim muassasasida 1000 dan ziyod quyon parvarishlanmoqda.

– Fan, ta'lim, sport, san'at, qo'ying-chi, barcha sohalarida muvaffaqiyatlarga erishayotgan yoshlar har bir viloyatning faxri, iftixori sanaladi, shunday emasmi?

– Albatta, bizning ham bu borada qo'lg'a kiritayotgan yutuqlarimiz talaygina. Viloyatdagi iqtidorli va ijodkor o'quvchilarni aniqlash va ularni rag'batlantirish maqsadida o'quvchilar o'rtasida turli ko'rik-tanlovlarni tashkil etib kelinmoqda. III bosqich fan olimpiadalarida viloyat bo'yicha umumta'lim muassasalaridan jami 550 nafar 9-sinf o'quvchilari ishtirok etdilar. Yurtimiz Mustaqilligining 20 yilligiga bag'ishlab umumta'lim muassasalarining 8-, 9-sinf o'quvchilari o'rtasida o'tkazilgan «Vatanimiz tarixini o'rganamiz» mavzusidagi insholar tanlovida Buxoro shahridagi 9-maktabning 8-sinf o'quvchisi Gulshan Aliyeva va Qorovulbozor tumanidagi 8-IDUMning 9-sinf o'quvchisi Chevar Rasulova g'olib bo'ldi va boshqarmaning faxriy yorlig'i hamda qimmatbaho sovg'alari bilan taqdirlandi.

– Viloyatda bolalar sportini rivojlantirish borasida amalga oshirilayotgan ishlar xususida ham to'xtalsangiz.

– Umumta'lim maktablarida jismoniy tarbiya va sport mashg'ulotlarini tashkil etish, o'quvchi-

tashkil qilgan bo'lsa, bugungi kunda ularning soni 38 taga yetgan. Shulardan 3 tasi Olimpiya zaxiralari sport maktablari hisoblanadi. Bundan tashqari viloyatda Olimpiya sport turlarini rivojlantirish maqsadida 8 ta maxsus sport maktab internatlari faoliyat ko'rsatib kelmoqda. 210 ta badiiy gimnastika to'garaklari tashkil etildi va zarur sport jihozlari bilan ta'minlandi. Bugungi kunda sportning bu turi bilan 4119 nafar qizlar shug'ullanib kelmoqdalar.

2010-yilda viloyatning iqtidorli sportchilaridan Husniyabonu G'ulomova Toshkent shahrida o'tkazilgan Osiyo chempionatida oltin medalni qo'lg'a kiritgan bo'lsa, Vengriya davlatida bo'lib o'tgan xalqaro musobaqada faxrli 2-o'rinni egalladi va shu yili Zulfiya nomidagi Davlat mukofoti sohibasiga aylandi. Yana bir sportchi qizimiz Sarvin Xoliqova Osiyo chempionatining kumush va oltin medali sohibasi bo'ldi...

– Ustoz, bu ro'yxatni hali ancha davom ettirishingiz mumkinligiga shubhamiz yo'q. Kelajagimiz egalari bo'lmish farzandlarimizni bilimli, ma'naviyatli qilib tarbiyalashdek xayrli ishlarimizda muvaffaqiyatlar tilaymiz.

qiz ta'lim-tarbiya olmoqda. Shulardan 2535 o'rinni 8 ta umumta'lim maktablari kapital rekonstruksiya qilindi. 5941 o'rinni 11 ta umumta'lim maktablari kapital ta'mirlandi. Shuningdek, Buxoro shahrida 200 o'rinni, G'ijduvon tumanida 150 o'rinni yangi musiqa va san'at maktablari qurildi. Bolalar sporti obyektlari ham e'tibordan chetda qolayotgani yo'q. Jondor tumanidagi 20-son, Kogon tumanidagi 13-son, Qorako'l tumanidagi 5-son sport maktab-internatlari, Peshko' tumanidagi 9-son, Olot tumanidagi 10-son, Romitan tumanidagi 27-son maktablarida jami 6 ta sport zallari qurilib, foydalanishga topshirildi.

– Xizmat yuzasidan ko'plab viloyatlarda, shahar va tumanlarda bo'lamiz. «Kichik biznes va xususiy tadbirkorlik yili» munosabati bilan joylardagi ta'lim maskanlarida amalga oshirilayotgan ibratli ishlar bilan tanishib, farzandlarimiz ta'lim-tarbiya olibgina qolmay, tadbirkorlik saboqlarini ham o'zlashtirib borayotganlaridan quvonamiz. Zero, davr talabi ham shunday, nima dedingiz?!

– O'tgan davrda ta'lim muassasalari pedagogik jamoalari tomonidan mazkur yo'nalishda qator amaliy ishlar bajarib kelinmoqda. Chunonchi, 328 bosh qoramol va 9520 ta parranda boqilmoqda.

NAVOIY BOBOM

O'zbekimning faxridir,
Azal Navoiy bobom.
Yozdi tilni ulug'lab,
G'azal Navoiy bobom.

Ilm-u urfon bobida,
Yaratdi u zo'r maktab.
Ijodiy merosini,
O'qiyimiz dildan asrab.

Besh dostonidan iborat,
«Xamsa» yaratgan bobom.
Qalam bilan dunyoga,
Dovrug' taratgan bobom.

Yuraklardan bir umr,
Joy olgansiz bobojon.
Hur elimni ruhingiz,
Qo'llab turadi har on.

Oyshajon RO'ZMETOVA,
Xorazm viloyati, Urganch shahridagi
5-maktabning 8-sinf o'quvchisi



TANTANALAR YARASHAR

Yurtimiz tinch va obod,
Xalqimiz hur va ozod,
Shunday ajib makonda,
Tantanadir har onda.

Osmon tiniq, musaffo,
Yurtga yarashar tinchlik.
Tanti odamlarida,
Mehr, oqibat kuchli.

Biz zukko o'g'il-qizlar,
Shu yurtning farzandimiz.
Har ishda kamarbasta,
O'zbekim dilbandimiz.

Maftuna BOTIROVA,
Toshkent viloyati, Qibray tumanidagi
34-umumta'lim maktabining
7-«B» sinf o'quvchisi



TUMORIM VATAN!

O'zing iftixorim, vijdonim orim,
Dunyoda yagonam, xumorim, Vatan!
Bag'ringda o'ynadim, quvondim, kuldim,
Mening ko'z qarog'im, tumorim Vatan!

Marjona AMINOVA,
Qashqadaryo viloyati, Shahrisabz tumanidagi
75-umumta'lim maktabining 4-sinf o'quvchisi

BARKAMOL AVLODMIZ

Biz barkamol avlodmiz,
Vatanimiz ertasi.
Xalqning erka farzandi,
Kelajakning egasi.

Ota-ona mehridan,
Bahramand shodmiz.
Yurt koriga shay turgan,
Barkamol avlodmiz.

Nurjamol NORQULOVA,
Toshkentdagi 6-ixtisoslashtirilgan maktabning
6-sinf o'quvchisi



(Davomi. Boshi o'tgan sonlarda)

PEPPI UZUNPAYPOQ

Astrid LINDGREN, shved yozuvchisi

3. Kutilmagan mehmonlar

– O'ylasam yetib qolar, – dedi Peppi, – xo'sh, Portugaliya... Bu yurtda otam bilan ko'p marta bo'lganman. Uning poytaxti... Lissabon! Bilib qo'yinglar!

Endi birinchi mirshabning jahli chiqdi.

– Huv, menga qara, qizgina! Sen bilan afsona aytishib o'tirgani vaqtimiz yo'q. Bizlarga seni olib kelinglar, degan. Olib ketamiz!

Mirshab Peppening bilagidan ushladi.

– Qani, yuraqol.

Shu payt Peppi yulqinib mirshabning qo'lidan chiqdi-da, tomga qarab yugurdi. Yo'l-yo'lakay narvonni sudray ketdi. Uni devorga tirab qo'yib, lipillab tom boshiga chiqib oldi. Mirshablar angraygan qolaverdilar. Peppi tomdan turib qichqirdi:

– Janoblar! Bu yoqqa chiqinglar! Bu yer juda bahavo ekan!

Mirshablarning iloji qolmadi. Ular istab-istamay narvondan o'rmalab tom boshiga chiqdilar. Shu payt Peppi maymundek bir irg'ishlab, mo'rkonga o'tib oldi va qo'lini cho'zib hayqirdi:

– Qani, hey, yonimga keling, yonimga!

Mirshablar asta-asta yurib, mo'rkonga yaqinlashdilar. Peppi esa,

sharaqlab kulgancha mo'rkondan sakrab tushdi va tom chetiga bordi-yu... baland daraxtning shoxiga osilib oldi. Keyin daraxt tanasiga yopishib, mushukday yerga sirg'alib tushdi: Ikki mirshab izlariga qaytdilar. Ular endi pastga tushmoqchi bo'lganlarida Peppi shartta narvonni olib, huv nariga otib yubordi. Yana xoxolab kuldi.

– Ho'v, jinnilik qilma, shayton qiz, – dedi birinchi mirshab, – yerga tushsak ta'ziringni beraman.

– Unaqa bo'lsa, narvonni qo'ymayman! – qaysarlik qildi Peppi, – ta'ziringizni yeb bo'lmasa, kiyib bo'lmasa! Tuzukroq bir nima va'da qiling, narvonni tirab qo'yay!

Ikkinchi mirshab muloyimroq gapirdi:

– Jon qizim, hazillashma.

Biz otang tengimiz-a? Ishga kech qolyapmiz, yerga tushaylik endi.

– Bu boshqa gap, – dedi Peppi, – yaxshi gapga ilon inidan chiqar emish. Men ilon emasman, onasidan ayrilgan, otasini kutayotgan bechoragina bir qizman.

U darrov narvonni joyiga qo'ydi. Ikkala mirshab pishillab yerga tushishdi. Peppi, biz yarashdik, endi menga tegmas, deb o'ylagan edi.

Teskarisi bo'lib chiqdi. Birinchi mirshab yerga tushdi-yu Peppening qo'lidan mahkam ushladi.

– Tuzoqqa tushdingmi, qochoq qiz, – dedi u mamnun kulib, – endi qo'lmdan chiqib bo'psan!

Peppi ranjib, boshini chayqadi:

– Sizlar g'irrom ekansizlar. Men sizlarni mard, deb tomdan tushirib o'tiribman-a? Bo'ldi, endi sizlar bilan



quvlamachiq o'ynamayman! Men ketdim, xayr!

Peppi siltandi. Mirshab esa, uning bilagini qattiqroq siqdi.

– Hech qayoqqa bormaysan. Men bilan yurasan.

Endi Peppening g'ashi keldi. U ikkala mirshabni yelkasidan changalladi-yu sudragancha ko'chaga chiqarib tashladi. Mirshablar bu oriqqina qizdan tortgan jabrlarini o'ylaganlaricha Peppi uyga kirdi. Ikkita kulcha olib qaytib chiqdi.

– Manglar, yo'lda yeb ketinglar. Qorinlaring ham ochgandir. Osh bo'lsin!

Mirshablar yolg'iz polvon qiz yashaydigan qarovsiz hovliga olayib ko'z tashlashdi-yu, ustlarini qoqib jo'nab qolishdi.

Yarim soatlar ichida bo'lib o'tgan bu tomoshani Tommi bilan Annika hayron va zavq bilan kuzatib o'tirishdi. Sovib qolgan qaymoq qo'shilgan qahvalariga ham e'tibor berishmadi. Peppi esa, otini egarlab, hovliga olib chiqar ekan, o'zicha ming'illadi:

– Lissabon... bolalar uyi ... karra jadvali emish. Hammasi, o'zingga buyursin, janob mirshabjon! Biz ot minib mazza qilamiz endi. Qani, Annika, Tommi, ot sayriga marhamat!

Ular yayrab-yayrab ot minib o'ynadilar. Xo'sh, mirshablar-chi, deysizmi? Ular kulcha chaynab idoralarga kelishdi. Lekin kichkina bir qizga kuchlari yetmaganini aytmadi. «Mayli, bolalar uyiga borishni istamasam, bormasin, o'zi xohlagancha yashayversin, birovga ziyoni tegmasa bo'ldi-da», deb hisob berishdi.

Shu-shu, Peppening hovlisiga qaytib mirshablar qadam bosishmadi.

(Davomi bor)

Sa'dulla SIYOYEV tarjimasi

BIZGA MASHINA SOVG'A QILISHDI...



Ha, o'tgan hafta naqd ikkita yangi mashinali bo'ldik... Avval o'zimni tanishtirsam: men Oksana Frolovaman. Rus millatidan bo'lsam-da, esimni taniganimdan buyon mahallada yashaymiz, oilada o'zbekcha gaplashamiz. Ko'plar moviy ko'zlarim-u, sap-sariq sochlarim, umuman, ko'rinishimga qarab rus tilida murojaat qilishadi-yu, mendan o'zbekcha javob eshitib, hayron bo'lishadi...

Toshkentdagi «SOS – bolalar mahallasi»da yashayotgan turli millatga mansub 80 nafarga yaqin bolalar – hammamiz o'zbekcha gapiramiz, o'zbekona yashaymiz!

Xullas, shu kunlarda mahallamizga qo'shaloq mashinalarning kirib kelishi barchamizni quvontirdi. Ularni topshirish marosimidagi homiylar uyushtirgan kattagina bayram dasturi, xonandalarning kuy-qo'shiqlari zavqimizni yanada oshirdi.

Yaqinda «Chevrolet» avtomobil kompaniyasining tashkil etilganiga

100 yil to'libdi. Shu munosabat bilan mazkur kompaniya dunyoning turli mamlakatlarida tashkil etilgan «SOS – bolalar mahallalari»ga o'zining 100 ta avtomobillarini taqdim etayotgan ekan.

Bu tuhfa bizga ham yetib keldi. Mahalla bolalarining qiziqishlarini bir ko'rsangiz edi... Biri ruliga o'tirgan, yana biri jihaz, qulayliklari bilan qiziqqan, boshqasi esa mutaxassislarni tezligiga oid savolga tutgan...

Bu yil kollej talabasi bo'lgan Mirzohid akamda haydovchilikka o'qish istagi paydo bo'ldi. Ukam Marat esa avtomobil muhandisi bo'lishni o'ylab yuribdi...

Biz mahalla bolalarining hukumatimiz, turli tashkilotlar, kompaniyalarning homiyliklaridan ko'nglimiz o'sadi. Xalqimiz mehri, e'tibori bilan ulg'ayib, yurtga foydali inson bo'lishga harakat qilamiz.

Oksana Frolova,
filologiya fanlariga
ixtisoslashgan davlat
umumta'lim maktabining
5-«D» sinf o'quvchisi

2007-yilda Favqulodda vaziyatlar va Xalq ta'limi vazirliklari hamda Respublika Ta'lim markazi tomonidan 5 – 9-sinf o'quvchilari uchun «Hayot xavfsizligi asoslari» kursining fanlar tarkibida integratsiyalangan o'quv dasturi taqdim etilgan edi. Poytaxtimizdagi 241-maktabda birinchilardan bo'lib bu borada amaliy ishga kirishildi. Maktab qoshida tajribali ustozlardan ishchi guruhi tuzildi. O'z ishining bilimdoni, milliy g'oya va ma'naviyat fani o'qituvchisi Nigora Muratova tajriba sinov maydonchasi rahbari etib tayinlandi. Nigora opa 5-sinf o'quvchilariga favqulodda holatlarda qanday harakatlanish yuzasidan saboq berishda soha mutaxassislari, ayniqsa, Fuqaro muhofazasi instituti xodimlari bilan hamkorlikni yo'lga qo'ydi.



Hayot qadri

XAVFSIZLIK SABOQLARI

Yaqinda Fuqaro muhofazasi institutida 241-maktab o'quvchilari ishtirokida Ta'lim tizimida Hayot xavfsizligi asoslarining o'rni o'quv-amaliy seminari bo'lib o'tdi. Seminarda institutning yetakchi mutaxassislari favqulodda holatlarda qanday harakatlanishga oid tavsiyalar berdilar. O'z navbatida maktabning 9-sinf o'quvchilari besh yil mobaynida hayot xavfsizligiga doir olgan saboqlarini amalda namoyish etdilar. Mutaxassislar bilan ochiq muloqot chog'ida o'quvchilar bu borada puxta bilimga ega ekanliklari yaqqol ko'rindi. Mashg'ulotlar maydonida Shahnoza

Mirhosilova,



Javohir G'ofurov, Mahbuba Pirmuhammedova va Jasur Xudoyberganov kabi o'quvchilar yong'in ro'y berganda va boshqa texnogen holatlarda qanday harakatlanishni amalda ko'rsatib, bu borada yutuqlarga erishganlarini namoyish etdilar. Quvonarlisi, tadbir ishtirokchilarining ko'pchiligi kelajakda mard va jasur insonlar kasbi bo'lmish qutqaruvchilik kasbini tanlabdilar. Yoshlarimizning o'zgalor koriga yarashni niyat qilayotgani biz kattalar qalbini iftixorga to'ldirdi.

Yusuf ABDULLAYEV
(suratlar muallifnigi)



ONA QUVONCHI



O'g'lim tahsil olayotgan (nomini yozmadim) kasb-hunar kollejida o'qiydigan ayrim bolalar sigaret chekishar ekan. Ular o'g'lim Burhonni ham chekishga undab, o'rta qo'yibdi. Unga ta'sir o'tkaza olmay, sha'nini yerga urishga harakat qilishibdi. «Burhon ota o'g'il emas, aya o'g'il», deyishibdi.

– Sen nima deding? – so'radim o'g'limdan.
– Ayajon, ularga gapirish befoyda, chunki onalari Sizga o'xshab yoshligidan nima savob-u, nima gunoh ekanligini, nima zarar-u, nima foyda ekanligini o'rgatmaganlar-da, deb kulib qo'ydi. Qalbm yorishib, gap-so'zlarim besamar ketmaganidan quvonib ketdim...

Salima XOLDOROVA,
Navoiy konmetallurgiya kombinati
5-kon boshqarmasi ma'naviyat targ'ibotchisi

HAFIZA SHOHSUPADA!

Yaqinda Toshkent shahrida O'zbekiston an'anaviy karate federatsiyasining navbatdagi turniri ham muvaffaqiyatli yakunlandi. Xalq ta'limi vazirligi, Bolalar sportini rivojlantirish jamg'armasi, uning Chilonzor tuman filiali va Respublika musiqa va san'atga ixtisoslashtirilgan maktab-internati hamkorligida o'tkazilgan turnirda navoiylik, samarqandlik va poytaxtlik karatechi qizlar ishtirok etdilar.

– 16 nafar shogirdlarim bilan musobaqada qatnashdik, – deydi Navoiy



viloyati jamoasi murabbiyi Tolib aka Toirov.

– Shogirdlarimdan 8 nafari shohsupaga ko'tarildi. Viloyatimizda qurib bitkazilgan va qad rostlayotgan sport inshootlari ana shunday yutuqlarimizga zamin yaratmoqda.

– Karatechi qizlar orasida shohsupaning faxrli o'rnini egallaganimdan xursandman.

Muvaffaqiyatlarim negizida murabbiyim Shuhrat aka Qo'shmurodovning xizmatlari beqiyos, – deydi Toshkent shahri vakilasi Hafiza Xushvaqtova.

Madina
MIRZAQOBULOVA

«ANTIQA» KEKSI

Kerakli mahsulotlar: 1 st qatiq, 1 st sut, 1 st shakar, 2 st un, 4 ta tuxum, tuz, vanilin, 2 dona banan, 1 piyola malina va 250 gr margarin.

Tayyorlanishi: qatiq, sut, tuxum, tuz, vanilin, shakar, eritilgan margarin, bir idishda yaxshilab aralashiriladi va un qo'shiladi. Tayyor xamir maxsus keks qolipida past olovda 20-30 daqiqa davomida pishiriladi.

«O'ZBEGIM» SALATI

Kerakli mahsulotlar: 2 dona bodring, 1 dona qizil sabzi, 2 ta tuxum, 1 osh qoshiq jo'xori, 100 gr mol go'shti, 3 dona salat bargi, 2 osh qoshiq mayonez, tuz.

Tayyorlanishi: sabzi, tuxum, mol go'shti alohida pishiriladi. Mol go'shti to'rtburchak shaklida, qolgan masalliqar esa somoncha shaklida to'g'ralib, mayda to'g'ralgan salat bargi, mayonez bilan aralashirilib, ta'bga ko'ra tuz sepib, dasturxonga tortiladi.

Pazanda qizga**NARGIZA tayyorladi**

Toshkent viloyati, Parkent tumanidagi 26-umumta'lim maktabining 3-«B» sinf o'quvchisi Gulyuz Hamroqulova onasining eng yaqin ko'makchisi. Maktabdagi o'qishlari a'lo, bo'sh vaqtida kitob o'qishni yoqtiradi. Ayniqsa, rasm chizish jon-u dili. Quyida e'tiboringizga Gulyuz chizib yuborgan ertak qahramonlarining rasmini havola qilyapmiz. U kelgusida mohir musavvir bo'lmoqchi. Keling, jaji rassom qizimizga biz ham omad tilaylik!



Kuz faslida yuz terisi hamda qo'llaringiz yorilib, dag'allashib qolishi mumkin. Shunday hollarda 1 qoshiq tvorogga 1 qoshiq yog'liq qatiq yoki smetana qo'shib yaxshilab aralashiring. So'ng yuzingizga 15 daqiqa surtib qo'ying va iliq suvda yuvib tashlang.

Foydali maslahatlar

Qishga saqlash uchun ko'p miqdorda olma xarid qildingizmi? Ularni yaxshi saqlash uchun yog'och yashikka joylab, ustidan qipiq sepib qo'ying.

Behi va turpning shamollashda, yo'talda foydasi katta. Kechqurun behi yoki turpning ichini o'yib, asal solib qo'ying. So'ngra uni duxovkada biroz ilitib, keyin iching, tezda yo'taldan forig' bo'lasiz.

MANZURA to'pladi

LABIRINT

Quyunchaga sabzi tomon olib boradigan yo'lni ko'rsating.

Osimxon VOSIXONOV chizgan rasmlardan foydalanildi.

XANDILAR

O'qituvchi o'quvchidan so'radi:

- Oqiljon, Yevropada kam uchraydigan uchta harfdan iborat hayvon nima?
- Sher.
- Sher Afrikada yashashini bilmaysanmi?
- Shuning uchun ham Yevropada kam uchraydi-da!

Ikki bolakay suhbatidan:

- Kel, Botir, «Hayvonot bog'ini» o'ynaymiz.
- Mayli, men kim bo'laman?
- Sen hayvonot bog'iga kelgan bola bo'lasan.
- Sen-chi?
- Men maymun bo'laman. Sen uyingdan menga apelsin olib kelasan.

Fayzulla ABDULLAYEV

TONG yulduzi**Muassislar:**

O'zbekiston Matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» yoshlar ijtimoiy harakati Markaziy Kengashi,
«SOG'LOM AVLOD UCHUN» hukumatga qarashli bo'lgan Xalqaro xayriya jam' armasi.

BOSH MUHARRIR:
To'lg'in HAYTIOV

Dizaynerlar:
Fazliddin SHOYODGOROV,
Olovuddin O'RIPOV
Rassom:
Feruza MATYOQUBOV
Navbatchi:
Yusuf ABDULLAYEV

Gazeta
O'zbekiston
Matbuot va
axborot
agentligida
0208-raqam
bilan 2007-yil
2-fevralda
ro'yxatdan
o'tgan.

TAHRIR HAY'ATI:
Svetlana INOMOVA,
Odina JAMOLDINOVA,
Jahongir MUSAYEV,
Jabbor RAZZOQOV,
Murtazo SULTONOV,
Feruza JALILOVA
(Bosh muharrir o'rinbosari),
Feruza ADILOVA
(mas'ul kotib),
Dilimurod RAHMATILLAYEV,
Dilshoda DADAJONOVA

Manzilimiz:

Toshkent shahri,
Navoiy ko'chasi, 30-uy.
Indeksi: 100129.
Obuna indeksi: 198.
e-mail: tong1924@bk.ru
www.tongyulduzi.uz
Tel: 244-27-25, 244-63-08
Tel./faks:
(99871) 244-38-10

«O'zbekiston»
NMIUda chop etildi.
Tahririyatga kelgan barcha
qo'lyozmalar tahrir qilinadi,
mualliflarga qaytarilmaydi.
Haftaning dushanba kuni
chiqadi. Shakli A-3,
2 bosma taboq.
ISSN 2010-6092
Adadi - 30680
Buyurtma N: J 3190